

東大漢文 白文 & 出典

2024 年

文科第 3 問 理科第 3 問

凡著書立論、必本於不得已而有言。而後其言當、其言信、其言有用。故君子之言、達事理而止、不為敷衍流宕、放言高論、取快一時。蓋非要則可厭、不確則可疑。既厭且疑、而其書不可貴信矣。君子之言、如寒暑晝夜、布帛菽粟、無可疑、無可厭。天下萬世信而用之、有丘山之利、無毫末之損。以此觀古今作者、昭然若白黑矣。著書不本諸身、則只是鬻其言者耳。老莊申韓之徒、學術雖偏、要各能自見於天下後世。斯義也、古文章之士猶能及之。降而不能乃剽賊矣。夫剽賊以為文、且不足以伝後、而況剽賊以著書邪。然而有識者恒病書之多也、豈不由此也哉。

(方東樹『書林揚鱗』「著書必有宗旨第三」)

2023 年

文科第 3 問 理科第 3 問

朕聞晉武帝自平吳已後、務在驕奢、不復留心治政。何曾退朝、謂其子劭曰、「吾每見主上、不論經國遠圖、但說平生常語。此非胎厥子孫者也。爾身猶可以免。」指諸孫曰、「此等必遇亂死。」及孫綏、果為淫刑所戮。前史美之、以為明於先見。

朕意不然。謂曾之不忠、其罪大矣。夫為人臣、當進思竭誠、退思補過、將順其美、匡救其惡。所以共為治也。曾位極台司、名器崇重。當直辭正諫、論道佐時。今乃退有後言、進無廷諍。以為明智、不亦謬乎。顛而不扶、安用彼相。

(吳兢『貞觀政要』卷一「君道第一」)

2022 年

文科第 3 問 理科第 3 問

宋人有取道者。其馬不進、剉而投之灞水。又復取道、其馬不進、又剉而投之灞水。如此者三。雖造父之所以威馬、不過此矣。不得造父之道而徒得其威、無益於御。

人主之不肖者有似於此。不得其道而徒多其威。威

愈多、民愈不用。亡國之主、多以多威使其民矣。

故威不可無有、而不足專恃。譬之若塩之於味。凡塩之用、有所託也。不適則敗託而不可食。威亦然。必有所託、然後可行。惡乎託。託於愛利。愛利之心諭、威乃可。行威太甚則愛利之心息。愛利之心息、而徒疾行威、身必咎矣。此殷夏之所以絕也。

(呂不韋『呂氏春秋』卷十九「用民」)

2021 年

文科第 3 問 理科第 3 問

凡為下者、為上所信、然後言有所取。為上者、為下所信、然後令有所下。事不欲速。欲速則不行也。庸愚之主必無斯憂。唯聰明之主恃其材者、或至一旦行之、不有所顧。夫知善而欲速成者、小人之事也。君子則不然。一言一行、其所及大遠。與其見効於一時、寧取成於子孫。是謂知大体也。

下民之愚、承弊之日久、則安於其弊、以為無便於此。加之狡猾者心知其弊、而口不言、因以自恣之。今欲矯其弊、則愚者狎其所習、而不肯之。狡者乃乘其機、陷之以不利。於是乎擾亂不成矣。大抵維持數百世之後、置國家於泰山之安者、如無近効。以其無近効、行之於未信之民、所以不服也。

(井上金峨『霞城講義』)

2020 年

文科第 3 問 理科第 3 問

于公為臬獄吏、郡決曹。決獄平、羅文法者、于公所決皆不恨。

東海有孝婦、少寡亡子。養姑甚謹。姑欲嫁之、終不肯。姑謂隣人曰、「孝婦事我勤苦。哀其亡子守寡。我老、久累丁壯、奈何」。其後姑自經死。姑女告吏、「婦殺我母」。吏捕孝婦。孝婦辭不殺姑。吏驗治、孝婦自誣服。具獄上府。于公以為此婦養姑十余年、以孝聞。必不殺也。太守不聽、于公爭之、弗能得。乃抱其具獄、哭於府上、因辭疾去。太守竟論殺孝婦。

郡中枯旱三年。後太守至、卜筮其故。于公曰、「孝婦不當死、前太守彊斷之。咎實在是乎」。於是太守殺牛、自祭孝婦冢、因表其墓。天立大雨歲孰。郡中以此

大敬重于公。

（班固『漢書』卷七十一 列伝 第四十一「于定国」）

2019 年

文科第 3 問 理科第 3 問

学校所以養士也。然古之聖王、其意不僅此也。必使治天下之具皆出於学校、而後設学校之意始備。天子之所是未必是、天子之所非未必非。天子亦遂不敢自為非是、而公其非是於学校。是故養士為学校之一事、而学校不僅為養士而設也。

三代以下、天下之是非一出於朝廷。天子榮之則群趨以為是、天子辱之則群趨以為非。而其所謂学校者、科挙鬻爭、富貴熏心。亦遂以朝廷之勢利一變其本領。而士之有才能學術者、且往往自拔於草野之間、於学校初無与也。究竟養士一事亦失之矣。

（黃宗義『明夷待訪錄』「学校」）

2018 年

文科第 3 問 理科第 3 問

先王之為天下、不患人之不為而患人之不能、不患人之不能而患己之不勉。

何謂不患人之不為而患人之不能。人之情所願得者、善行・美名・尊爵・厚利也。而先王能操之以臨天下之士。天下之士、有能遵之以治者、則悉以其所願得者以与之。士不能則已矣。苟能、則孰肯舍其所願得而不自勉以為才。故曰、不患人之不為、患人之不能。

何謂不患人之不能而患己之不勉。先王之法、所以待人者尽矣。自非下愚不可移之才、未有不能赴者也。然而不謀之以至誠惻怛之心力行而先之、未有能以至誠惻怛之心力行而應之者也。故曰、不患人之不能而患己之不勉。

（王安石『新刻臨川王介甫先生文集』卷三十九「仁宗皇帝言事書」）

2017 年

文科第 3 問 理科第 3 問

齊奄家畜一猫、自奇之、号於人曰虎猫。客說之曰、「虎誠猛、不如龍之神也。請更名曰龍猫」。又客說之曰、「龍固神於虎也。龍昇天須浮雲、雲其尚於龍乎・不

如名曰雲」。又客說之曰、「雲靄蔽天、風倏散之。雲固不敵風也。請更名曰風」。又客說之曰、「大風颿起、維屏以牆、斯足蔽矣。風其如牆何。名之曰牆猫可」。又客說之曰、「維牆雖固、維鼠穴之、牆斯圯矣。牆又如鼠何。即名曰鼠猫可也」。

東里丈人嗤之曰、「噫嘻、捕鼠者故猫也。猫即猫耳。胡為自失本真哉」。

（劉元卿『賢奕編』卷三「應諧」）

2016 年

文科第 3 問 理科第 3 問

寓居定惠院之東、雜花滿山、有海棠一株、土人不知貴也

江城地瘴蕃草木	只有名花苦幽独
嫣然一笑竹籬間	桃李漫山綰粗俗
也知造物有深意	故遣佳人在空谷
自然富貴出天姿	不待金盤薦華屋
朱唇得酒暈生臉	翠袖卷紗紅映肉
林深霧暗曉光遲	日暖風輕春睡足
雨中有淚亦悽慘	月下無人更清淑
先生食飽無一事	散步逍遙自捫腹
不問人家与僧舍	拄杖敲門看修竹
忽逢絕艷照衰朽	嘆息無言揩病目
陋邦何處得此花	無乃好事移西蜀
寸根千里不易致	銜子飛來定鴻鵠
天涯流落俱可念	為飲一樽歌此曲
明朝酒醒還独來	雪落紛紛那忍触

（蘇軾「寓居定惠院之東雜花滿山有海棠一株土人不知貴也」）

2015 年

文科第 3 問 理科第 3 問

高西園嘗夢一客來謁、名刺為司馬相如。驚怪而寤、莫悟何祥。越數日、無意得司馬相如一玉印。古沢斑駁、篆法精妙、真昆吾刀刻也。恒佩之不去身、非至親昵者、不能一見。官塩場時、德州盧丈為兩淮運使、聞有是印、燕見時、偶索觀之。西園離席半跪、正色啓曰、「鳳翰一生結客、所有皆可与朋友共、其不可共者、惟二物、此印及山妻也」。盧丈笑遣之曰、「誰奪爾物者、何痴乃爾耶」。

西園画品絶高、晚得末疾、右臂偏枯、乃以左臂揮毫。雖生硬倔強、乃弥有別趣。詩格亦脱灑。雖托跡微官、蹉跎以歿。在近時士大夫間、猶能追前輩風流也。

（紀昀『閱微草堂筆記』卷十一「槐西雜志一」）

2014 年

文科第 3 問 理科第 3 問

長樂公主將出降。上以公主皇后所生、特愛之、勅有司資送倍於永嘉長公主。魏徵諫曰、「昔漢明帝欲封皇子曰、『我子豈得與先帝子比』皆令半楚・淮陽。今資送公主倍於長主、得無異於明帝之意乎」。上然其言、入告皇后。后嘆曰、「妾亟聞陛下称重魏徵、不知其故。今觀其引禮義以抑人主之情、乃知真社稷之臣也。妾與陛下結髮為夫婦、曲承恩禮、每言必先候顏色、不敢輕犯威嚴。況以人臣之疎遠、乃能抗言如是。陛下不可不從」。因請遣中使齎錢絹以賜徵。

上嘗罷朝、怒曰、「會須殺此田舍翁」。后問為誰。上曰、魏徵每廷辱我」。后退、具朝服立于庭。上驚問其故。后曰、「妾聞主明臣直。今魏徵直、由陛下之明故也。妾敢不賀」。上乃悅。

（司馬光『資治通鑑』卷百九十四「太宗文武大聖大廣孝皇帝上之下貞觀六年」）

2013 年

文科第 3 問 理科第 3 問

溫達、高句麗平岡王時人也。破衫弊履、往來於市井間。時人目之為愚溫達。平岡王少女兒好啼。王戲曰、「汝常啼聒我耳、當婦之愚溫達」。王每言之。及女年二八、王欲下嫁於高氏。公主對曰、「大王常語汝必為溫達之婦。今何故改前言乎。匹夫猶不欲食言、況至尊乎。故曰『王者無戲言』。今大王之命謬矣。妾不敢祇承」。王怒曰、「宜從汝所適矣」。於是公主出宮独行、至溫達之家。見盲老母、拜問其子所在。老母對曰、「惟我息不忍飢、取榆皮於山林。久而未還」。公主出行至山下、見溫達負榆皮而來。公主與之言懷。溫達悖然曰、「此非幼女子所宜行、必非人也」。遂行不顧。公主明朝更入、與母子備言之。溫達依違未決、其母曰、「吾息至陋、不足為貴人匹。吾家至窶、固不宜貴人居」。公主對曰、「古人言『一斗粟猶可舂、一尺布猶可縫』則苟為同心、何必富貴然後可共乎」。乃舍金釧、買得田宅

牛馬器物。

（金富軾『三國史記』卷四十五 列傳 第五「溫達」）

2012 年

文科第 3 問 理科第 3 問

公曰、「唯拋與我和夫」。晏子對曰、「拋亦同也。焉得為和」。公曰、「和與同異乎」。對曰、「異。和如羹焉。水火醯醢鹽梅以烹魚肉、燂之以薪。宰夫和之、齊之以味、濟其不及、以洩其過。君子食之、以平其心。君臣亦然。君所謂可而有否焉、臣獻其否、以成其可。君所謂否而有可焉、臣獻其可、以去其否。是以、政平而不干、民無爭心。先王之濟五味、和五聲也、以平其心、成其政也。聲亦如味。君子聽之、以平其心。今拋不然。君所謂可、拋亦曰可、君所謂否、拋亦曰否。若以水濟水。誰能食之。若琴瑟之專一。誰能聽之。同之不可也如是」。

（左丘明『春秋左氏傳』「昭公二十年」）

2011 年

文科第 3 問 理科第 3 問

放旅雁 元和十年冬作

九江十年冬大雪	江水生冰樹枝折
百鳥無食東西飛	中有旅雁聲最飢
雪中啄草水上宿	翅冷騰空飛動遲
江童持網捕將去	手携入市生壳之
我本北人今謫謫	人鳥雖殊同是客
見此客鳥傷客人	贖汝放汝飛入雲
雁雁汝飛向何處	第一莫飛西北去
淮西有賊討未平	百萬甲兵久屯聚
官軍賊軍相守老	食盡兵窮將及汝
健兒飢餓射汝喫	拔汝翅翎為箭羽

（白居易「放旅雁」）

2010 年

文科第 3 問 理科第 3 問

一巨商姓段者、蓄一鸚鵡甚慧。能誦李白宮詞、每客至則呼茶、問客人安否寒暄。主人惜之、加意籠豢。一旦段生以事繫獄。半年方釈到家、就籠與語曰、「鸚哥、我自獄中半年不能出、日夕惟只憶汝。家人餒飲、無失

時否」。鸚哥語曰、「汝在禁數月不堪、不異鸚哥籠閉歲久」。其商大感泣、乃特具車馬、携至秦隴、揭籠泣放。其鸚哥整羽徘徊、似不忍去。後聞止巢於官道隴樹之末、凡吳商驅車入秦者、鳴於巢外曰、「客還見我段二郎安否。若見時、為我道鸚哥甚憶二郎」。

(文瑩『玉壺清話』卷六)

2009 年

文科第 3 問 理科第 3 問

宋之神廟謂趙鉄面曰、「卿入蜀、以一琴一亀自隨、為政簡易也」。一日余友人、袖小画軸來、見需贊語。不知為何図。掛壁間逾月、坐臥質焉。梅則花中御史、表趙抃之為鉄面御史。屋頭長松之屈蟠、而有大雅風声者、豈非一張琴邪。一亀亦浮遊水上。神廟之片言、頗与絵事合符。名之曰「趙抃一亀図」、則可乎。

莫怪床頭不置琴 長松毎日送遺音

主人鉄面有何樂 唯使一亀知此心

(万里集九『梅花無尽蔵』)

2008 年

文科第 3 問 理科第 3 問

周鉄厓屢試秋闈不售。一日自他処歸、夜泊船村落間。望見臨水一家、樓窓外有碧火如環。舟人見而駭曰、「縊鬼求代、多作此状。此家必有將縊死者。慎勿声、鬼為人所覺、且移禍於人。」周奮然曰、「見人死而不救、非夫也。」登岸、叩門大呼。其家出問、告以故、大驚。蓋姑婦方勃谿、婦泣涕登樓。聞周言、亟共登樓、排闥而入、婦手持帶立牀前、紳已痴矣。呼之踰時始覺、拳家共勸慰之、乃已。周次日抵家。夢一老人謂之曰、「子勇於為善、宜食其報。」周曰、「他不敢望、敢問我於科名何如。」老人笑而示以掌。掌中有「何可成」三字。寤而歎曰、「科名無望矣。」其明年、竟登賢書。是科主試者為何公、始悟夢語之巧合也。

(俞樾『右台仙館筆記』卷八)

2007 年

文科第 3 問 理科第 3 問

木八刺、字西瑛、西域人。一日、方与妻対飯、妻以小金鑊刺臠肉、将入口、門外有客至。西瑛出肅客妻不

及啖、且置器中起去治茶。比回、無覓金鑊処。時一小婢在側執作。意其窃取、拷問万端、終無認辞、竟至隕命。歳余、召匠者整屋掃瓦領積垢、忽一物落石上有声。取視之、乃向所失金鑊也。与朽骨一塊同墜。原其所以、必是猫来偷肉、故帶而去。婢偶不及見、而含冤以死。哀哉。世之事如此者甚多。姑書焉、以為後人鑑也。

(陶宗儀『輟耕録』卷十一)

2006 年

文科第 3 問 理科第 3 問

余友劉伯時、嘗見淮西士人楊勔。自言中年得異疾、每發言応答、腹中輒有小声効之。數年間、其声浸大。有道士見而驚曰、「此応声虫也。久不治、延及妻子。宜讀本草。遇虫所不应者当取服之。」勔如言。讀至雷丸、虫忽無声。乃頓餌數粒遂愈。余始未以為信。其後至長汀、遇一丐者。亦有是疾。環而觀者甚衆。因教之使服雷丸。丐者謝曰、「某貧無他技。所以求衣食於人者、唯借此耳。」

(彭乘『統墨客揮犀』卷五)

2005 年

文科第 3 問

「好名之人、能讓千乘之國、苟非其人、簞食豆羹見於色。」此真孟子通達世故語也。余嘗見慷慨之士揮斥千金、毫不吝惜、於一二金出納、或不免斷斷者、事過之後、在己未嘗不失笑也。五茸葉桐山為河間通判、治餉宣府。当更代日、積資余三千金。桐山悉置不問。主者遣一吏持至中途、以成例請。桐山曰、「不受羨、即吾例也。」命歸之。晚居春申故里、饘粥不繼。一日梅雨中、童子張網失一大魚。桐山為呀嘆。其妻聞之曰、「三千金却之、一魚能值幾何。」桐山亦撫掌大笑。雖然、居今之世、桐山可不謂賢乎。

(陳其元『庸間齋筆記』卷二「三千金不及一魚」)

理科第 3 問

君能納諫、不能使臣必諫、非真能納諫之君。夫君之大、天也、其尊、神也、其威、雷霆也。人之不能抗天触神忤雷霆亦明矣。聖人知其然。故立賞以勸之。伝曰、「興王賞諫臣。」是也。猶懼其選奕阿諛使一日不得聞其

過。故制刑以威之。書曰、「臣下不正、其刑墨。」是也。人之情、非病風喪心、未有避賞而就刑者。何苦而不諫哉。賞与刑不設、則人之情、又何苦而抗天触神忤雷霆哉。自非性忠義不悅賞不畏罪、誰欲以言博死者。人君又安能尽得性忠義者而任之。

（蘇洵『嘉祐集』卷九・史論「諫論下」）

2004 年

文科第 3 問

孝宗時辭朝法甚嚴、雖蜀人守蜀郡、不遠万里來見。有蜀守當朝辭、素不能文、以為憂。其家素事梓潼神。夜夢神謂之曰、「兩辺山木合、終日子規啼。」覺莫曉其故。會朝對、上問、「卿從峽中來乎、風景如何。」守即以前兩語對。上首肯再三。翌日謂宰相趙雄曰、「昨有蜀人對者。朕問峽中風景、彼誦杜詩以對。三峽之景、宛在目中。可謂善言詩也。可與寺丞・寺簿。」雄退朝召問之曰、「君何以能爾。」守不敢隱。雄曰、「吾固疑君不能及此。若留中、上再問、敗矣。不若歸蜀赴郡。」他日上復問其人、雄對曰、「臣嘗以聖意語之、彼不願留。」上嘆曰、「恬退乃爾、尤可嘉。可予憲節使。」

（田汝成『西湖遊覽志余』余卷二十三「委巷叢談」）

理科第 3 問

歐陽文忠公嘗言、「有患疾者。医問其得疾之由。曰、『乘船遇風、驚而得之。』医取多年桺牙為桺工手汗所漬処、刮末、雜丹砂・茯苓之流。飲之而癒。」今、『本草注別藥性論』云、止汗、用麻黄根節及故竹扇為末服之。文忠因言、「医以意用藥多此比。初似兒戲、然或有驗、殆未易致詰也。」予因謂公、「以筆墨燒灰飲学者、当治昏惰耶。推此而広之、則飲伯夷之盥水、可以療貪、舐樊噲之盾、可以治怯矣。」公遂大笑。

（蘇軾『東坡志林』卷三「技術 記與歐公語」）

2003 年

文科第 3 問

敝郷之東、有大都邑、名曰垂徳那。其在昔時、興學勸教、人文甚盛。賁煖氏者、當時大學之領袖也。其人有徳有文。偶四方使者、因事來廷。国王知使者賢、甚敬之、則大饗之。是日所談、莫非高論。如雲如雨、各逞才智。独賁煖終席不言。將徹、使問之曰、「吾儕歸

復命乎寡君、謂子如何。」曰、「無他、惟曰垂徳那有老者、於大饗時能無言也。」祇此一語、蘊三奇矣。老者四体衰劣、独舌弥強毅、当好言也。酒於言、如薪於火、即訥者於是中変而嘩也。垂徳那、彼時賢者所出、佞者所出、則售言大市也。有三之一、難禁言、矧三兼之乎。故史氏不誌諸偉人高論、而特誌賁煖氏之不言也。

（利瑪竇『畸人十篇』卷上「君子希言而欲無言第五」）

理科第 3 問

秦襄王病。百姓為之禱。病愈、殺牛塞禱。郎中閻遏、公孫衍出見之。曰、「非社臘之時也、奚自殺牛而祠社。」怪而問之。百姓曰、「人主病、為之禱。今病愈、殺牛塞禱。」閻遏、公孫衍説、見王、拜賀曰、「過堯舜矣。」王驚曰、「何謂也。」對曰、「堯舜其民未至為之禱也。今王病、而民以牛禱、病愈、殺牛塞禱。故臣窃以王為過堯舜也。」王因使人問之。「何里為之。」訾其里正与伍老、屯二甲。閻遏、公孫衍媿不敢言。王曰、「子何故不知於此。彼民之所以為我用者、非以吾愛之為我用者也。以吾勢之為我用者也。故遂絶愛道也。」

（韓非『韓非子』卷十四「外儲說右下第三十五」）

2002 年

文科第 3 問

或曰、「梅以曲為美、直則無姿。以欹為美、正則無景。」此文人画士、心知其意、未可明詔大号以繩天下之梅也。又不可以使天下之民斫直鋤正、以殀梅病梅為業、以求錢也。有以文人画士孤癖之隱、明告鬻梅者、斫其正、鋤其直、遏其生氣、以求重價。而天下之梅皆病。文人画士之禍之烈至此哉。予購三百盆、皆病者、無一完者。既泣之三日、乃誓療之。毀其盆、悉埋於地、解其縛、以五年為期、必復之全之。予本非文人画士、甘受詬厲、闢病梅之館以貯之。嗚呼。安得使予多暇日、又多閑田、以広貯天下之病梅、窮予生之光陰以療梅也哉。

（龔自珍「病梅館記」）

理科第 3 問

応槲為汲令。以夏至日見主簿杜宣、賜酒。時北壁上有懸赤弩、照於盃中、其形如蛇。宣畏惡之。然不敢不飲。其日便得胸腹痛切、妨損飲食、大以羸露。攻治万

端、不為癒。後、郴因事過至宣家、窺視、問其變故、云、「畏此蛇。蛇入腹中。」郴還聽事、思惟良久、顧見懸弩、「必是也。」則使鈴下徐扶輦載宣、於故處設酒、盃中故復有蛇。因謂宣、「此壁上弩影耳、非有他怪。」宣意遂解、甚夷憚、由是瘳平。

（応劭『風俗通義』卷九・怪神「世間多有見恠驚怖以自傷者」）

2001 年

文科第 3 問

A. 蘇小小墓
幽蘭露 如啼眼
無物結同心 煙花不堪剪
草如茵 松如蓋
風為裳 水為珮
油壁車 夕相待
冷翠燭 勞光彩
西陵下 風雨晦

（李賀「蘇小小墓」）

B. 幽蘭露、是墓蘭露、是蘇小小墓。生時解結同心、今無物可結矣。煙花已自不堪剪也。時則墓草已宿而如茵矣、墓松則偃而如蓋矣。奚以想象其裳、則有風環於前而為裳、奚以髣髴其珮、則有水鳴於左右而為珮。壁車如故、久相待而不來。翠燭寒生、勞光彩之自照。西陵之下、則維風雨之相吹、尚何影響之可見哉。

（曾益『李賀詩解』）

理科第 3 問

或問曰、「堯舜傳之賢、禹傳之子、信乎。」曰、「然。」曰、「然則禹之賢不及於堯與舜也歟。」曰、「不然。堯舜之傳賢也、欲天下之得其所也。禹之傳子也、憂後世爭之之亂也。堯舜之利民也大、禹之慮民也深。」曰、「禹之慮也則深矣、傳之子而當不淑、則奈何。」曰、「傳之人則爭、未前定也。傳之子則不爭、前定也。前定雖不當賢、猶可以守法。不前定而不遇賢、則爭且亂。天之生大聖也不數、其生大惡也亦不數。傳諸人、得大聖、然後人莫敢爭。傳諸子、得大惡、然後人受其亂。」

（韓愈『昌黎先生文集』卷十一「對禹問」）

2000 年

文科第 3 問

閩藩司庫藏弗飭、大順語左使治之。不聽。已果大亡庫銀、悉逮官吏邏卒五十人於獄。大順曰、「盜多不過三人、而繫五十人。即盜在、是亦四十七人冤矣。」請代治獄。左使喜屬大順。大順悉遣之、戒曰、「第往跡盜、旬日來言。」

福寧人與鐵工隣居。夜聞銷聲、窺之、所銷銀元寶也。以詣官。工曰、「貸諸某家。」某家証之曰、「然。」首者以誣坐矣。大順曰、「鐵工貧人游食、誰有以五十金貸者。此是盜也。」令索得之、一訊輒輸曰、「盜者、吏舍奴也。使某開庫鑄、酬我耳。」搜捕奴、具得贓、五十人皆積。

（何喬遠『閩書』卷四十六・文苑志「右隆慶中任」）

理科第 3 問

孔子曰、「導之以政、齊之以刑、民免而無恥。導之以德、齊之以禮、有恥且格。」老氏稱、「法令滋章盜賊多有。」太史公曰、信哉是言也。法令者、治之具而非制治清濁之源也。昔天下之網嘗密矣。然姦偽萌起、其極也、上下相遁、至於不振。當是之時、吏治若救火揚沸。非武健嚴酷、惡能勝其任而愉快乎。言道德者溺其職矣。漢興、破觚而為圓、斲雕而為朴、網漏於吞舟之魚。而吏治烝烝不至於姦、黎民艾安。由是觀之、在彼不在此。

（司馬遷『史記』卷百二十二 酷吏列傳 第六十二 序）

1999 年

文科第 4 問

李子南渡一江、有與方舟而濟者。兩舟之大小同、榜人之多少均、人馬之衆寡幾相類。而俄見其舟離去如飛、已泊彼岸。予舟猶逡迴不進。問其所以、則舟中人曰、「彼有酒以飲榜人、榜人極力蕩槳故爾。」予不能無愧色、因嘆曰、「嗟乎。此區區一葦所如之間、猶以賂之有無、其進也有疾徐先後。況宦海競渡中、顧吾手無金、宜乎至今未霑一命也。」書以為異日觀。

（李奎報『東國李相國集』卷二十一「舟賂說」）

文科第 7 問

百憂集行
憶年十五心尚孩 健如黃犢走復來
庭前八月梨棗熟 一日上樹能千迴
即今倏忽已五十 坐臥只多少行立
強將笑語供主人 悲見生涯百憂集
入門依旧四壁空 老妻睹我顏色同
痴兒不知父子礼 叫怒索飯啼門東
(杜甫「百憂集行」)

理科第 4 問

人生处世、如白駒過隙耳。一壺之酒、足以養性、一簞之食、足以怡形。生在蓬蒿、死葬溝壑。瓦棺石槨、何以異茲。吾嘗夢為魚、因化為鳥。當其夢也、何樂如之。及其覺也、何憂斯類。良由吾之不及魚鳥者遠矣。故魚鳥飛浮、任其志性。吾之進退、恒存掌握。举手懼觸、搖足恐墮。若使吾終得魚鳥同遊、則去人間如脫屣耳。
(姚思廉・魏徵『梁書』卷四十四 列傳 第三十八「世祖二子 忠壯世子方等」)

1998 年

文科第 4 問

僕聞、足下比日復臥疾。凡疾、必慎於微。體既羸、則難為療矣。足下讀書銳敏、應事與人言、不啻精氣。或曰、「冬日之閉凍也不固、則春夏之長草木也不茂。」天地不能常有常費、而況人乎。身非吾有也。為子、則當為父母顧其養。為人、則當為天地貴其生。人生最難遇者、共學之友。僕病且衰、於賢者重有望焉。故不覺、言之危苦。惟時思之、而無異日之悔、則幸甚矣。
(方苞『方望溪遺集』)

文科第 7 問

謝公最小偏憐女 自嫁黔婁百事乖
顧我無衣搜蠹篋 泥他沽酒拔金釵
野蔬充膳甘長藿 落葉添薪仰古槐
今日俸錢過十萬 與君營奠復營齋
(元稹「遣悲懷三首」其一)

理科第 4 問

或曰、「龍眠居士作山莊圖。使後來入山者、信足而行、自得道路、如見所夢、如悟前世。見山中泉石草木、不問而知其名、遇山中漁樵隱逸、不名而識其人。此豈強記不忘者乎。」曰、「非也。畫日者常疑餅、非忘日也。醉中不以鼻飲、夢中不以足捉。天機之所合、不強而自記也。居士之在山也、不留於一物、故其神與萬物交、其智與百工通。雖然有道有芸、有道而不芸、則物雖形於心、不形於手。」
(蘇軾『東坡題跋』卷下「書李伯時山莊圖」)

1998 年

文科第 4 問 理科第 4 問

有客忽叩門 來送潤筆需
乞我作墓誌 要我工為諛
言政必龔黃 言學必程朱
吾聊以為戲 如其意所須
補綴成一篇 居然君子徒
核諸其素行 十鈞無一銖
此文倘傳後 誰復知賢愚
或且引為摶 竟入史冊摹
乃知青史上 大半亦屬誣
(趙翼「後園居詩十首」其五)

文科第 7 問

罰之使人懲惡、不若賞之使人能勸善。威之使人畏刑、不若恩之使人能懷德。惡之使人遠惡、不若愛之使人能感心。孟子曰、「中也養不中、才也養不才。故人樂有賢父兄也。如中也棄不中、才也棄不才、則賢不肖之相去、其間不能以寸。」世有兄賢而弟不肖、惡之過甚、反激成其惡者。豈非孟子所謂賢不肖之相去、不能以寸者耶。故養不肖子弟者、以善處為要。善處以能愛為本。
(伊藤仁齋『古學先生文集』卷五「同志會筆記」)

1996 年

文科第 4 問 理科第 4 問

女巫郝媼、村婦之狡黠者也。自言狐神付其體、言人休咎。凡人家細務、一一周知。故信之者甚衆。嘗有孕

婦問所生男女。郝許以男。後乃生女。婦詰以神語無驗。郝瞋目曰、「汝本應生男。某月某日汝母家饋餅二十、汝以其六供翁姑、匿其十四自食。冥司責汝不孝、轉男為女。汝尚不悟耶。」婦不知此事先為所偵、遂惶駭伏罪。

一日方焚香召神、忽端坐朗言曰、「吾乃真狐神也。此嫗陰謀百出、以妖妄斂財、乃託其名於吾輩。故今日真付其體、使共知其姦。」語訖、郝霍然如夢醒。狼狽遁去、後莫知所終。

(紀昀『閱微草堂筆記』卷四「灤陽消夏錄四」)

文科第7問

轉蓬離本根 颺飆隨長風
何意迴飆拳 吹我入雲中
高高上無極 天路安可窮
類此遊客子 捐軀遠從戎
毛褐不掩形 薇蕢常不充
去去莫復道 沈憂令人老

(曹植「雜詩六首」其二)

1995 年

文科第4問

夫天有所分予、予之齒者去其角、附其翼者兩其足。是受大者不得取小也。古之所予祿者、不食於力、不動於末。是亦受大者不得取小、與天同意者也。夫已受大、又取小、天不能足、而況人乎。此民之所以囂囂苦不足也。身寵而戴高位、家溫而食厚祿、因乘富貴之資力、以與民爭利於下、民安能當之哉。故受祿之家、食祿而已、不與民爭業。然後利可均布、民可家足。此天之理、亦古之道。

(班固『漢書』卷五十六 董仲舒傳 第二十六)

文科第7問

題歸夢 李賀
長安風雨夜 書客夢昌谷
怡怡中堂笑 少弟裁澗菰
家門厚重意 望我飽飢腹
勞勞一寸心 燈花照魚目

(李賀「題歸夢」)

理科第4問

白居易「婦人苦」詩云、「婦人一喪夫、終身守孤子。有如林中竹、忽被風吹折。一折不重生、枯死猶抱節。男兒若喪婦、能不暫傷情。應似門前柳、逢春易發榮。風吹一枝折、還有一枝生。為君委曲言、願君再三聽。須知婦人苦、從此莫相輕。」其言尤藹然。『莊子』天道篇云、堯告舜曰、「吾不虐無告、不廢窮民。苦死者、嘉孺子而哀婦人。此吾所以用心也。」此聖人言也。『天方典禮』引謨罕墨特云、「妻暨僕、民之二弱也。衣之食之、勿命以所不能。」蓋持世之人未有不計及此者。

(俞正燮『癸巳存稿』卷四「女」)

1994 年

文科第4問 理科第4問

唐有殷安者。嘗謔其子堪為宰相曰、「汝肥頭大面、不識今古、噉食無意智。不作宰相而何。」我謂肥頭大面、能噉食、猶盛時有福氣宰相也。若末世、只「無意智不識今古」七字、足作宰相矣。記、僖・昭時、有白衫拳子、乞而歌於市云、

執板高歌乞箇錢 塵中流浪且隨緣

直饒到老長如此 猶勝危時弄化權

嗟乎、使白衫拳子寧為乞丐、無為宰相、天下安得不亡。

(胡震亨『唐詩談叢』)

文科第7問

數歲之後、道安方啓師求經。師與『弁意經』一卷可五千言。安齋經入田、因息就覽。暮歸以經還師、更求余者。師曰、「昨經未讀、今復求耶。」答曰、「即已闇誦。」師雖異之、而未信也。復與『成具光明經』一卷減一萬言。齋之如初、暮復還師。師執經復之、不差一字。師大驚嗟而異之。後、為授具戒、恣其遊學。至鄴入中寺、遇仏凶澄。澄見而嗟嘆、與語終日。衆見形貌不稱、咸共輕怪。澄曰、「此人遠識、非爾儔也。」因事澄為師。

(慧皎『高僧傳』卷五)

1993 年

文科第 4 問

清風定何物 可愛不可名
所至如君子 草木有嘉聲
我行本無事 孤舟任斜橫
中流自偃仰 適與風相迎
拳杯屬浩渺 樂此兩無情
歸來兩溪間 雲水夜自明

（蘇軾「與王郎昆仲及兒子邁遠城觀荷花登峴山亭晚入飛英寺分韻得月明星稀四首」其二）

文科第 7 問

卜者子不習本業、父譴怒之。子曰、「此甚易耳。」次日有從風雨中求卜者、父命子試為之。子即問曰、「汝東方來乎。」曰、「然。」復問、「汝為妻卜乎。」亦曰、「然。」其人卜畢而去。父驚問曰、「爾何前知如此。」子答曰、「今日乃東風、其人向西而來、肩背盡濕。是以知之。且風雨如是。不為妻誰肯為父母出來。」

或曰、「卜者子甚聰明、可惜不曾讀孟子。若讀了孟子時、便知人性皆善。豈有視父母反輕於妻之理。」

（趙南星『笑贊』「卜者子」）

理科第 4 問

自宋以前、士之讀書者多。故所貴不在博、而在考弁之精也。至明、學者多束書不讀、自舉業外、茫無所知。於是才智之士務搜覽新異、無論雜家小說、近世叢書、凡昔人所鄙而不屑道者、咸居之為奇貨、以傲當世不讀書之人。曰、「吾誦得陰符・山海經矣。」曰、「吾誦得呂氏春秋・韓詩外傳矣。」公然自詡於人、人亦公然詡之以為博。若六經為藜藿、而此書為熊掌者、良可慨也。

（崔述『考信錄』前錄 提要）

1992 年

文科第 4 問 理科第 4 問

〔Ⅰ〕武昌陽新縣北山上、有望夫石、狀若人立者。伝云、「昔有貞婦、其夫從役、遠赴國難。婦携弱子、餞送此山。立望而形化為石。」

（『列異伝』）

〔Ⅱ〕願望臨碧空 怨情感離別

江草不知愁 巖花但爭發
雲山萬重隔 音信千里絕
春去秋復來 相思幾時歇

（李白「望夫山」）

〔Ⅲ〕終日望夫夫不歸 化為孤石苦相思
望來已是幾千載 只似當時初望時

（劉禹錫『望夫石』）

文科第 7 問

李信純、家養一狗、字曰黑龍。愛之尤甚。行坐相隨、飲饌之間、皆分與食。忽一日、於城外飲酒大醉。歸家不及、臥於草中。遇〃太守鄭瑕出獵、見田草深、遣人縱火燒之。信純臥處、恰當順風。犬見火來、乃以口拽信純衣、信純亦不動。臥處、比有一溪、相去三五十步。犬即奔往入水、濕身走來臥處、周迴以身灑之、獲免主人大難。犬運水困乏、致斃於側。俄而信純醒來、見犬已死、遍身毛濕、甚訝其事。覩火踪跡、因而慟哭。聞於太守。太守憫之曰、「犬之報恩甚於人。人不知恩、豈如犬乎。」

（干寶『搜神記』卷二十）

1991 年

文科第 4 問

梅花
當年蠟月半 已覺梅花闌
不信今春晚 俱來雪裏看
樹動懸冰落 枝高出手寒
早知覓不見 真悔着衣單

（庾信「梅花」）

文科第 7 問

楊誠齋夫人羅氏、嘗於郡圃種紵、躬紡績以為衣。時年蓋八十余矣。其子東山、月俸分以奉母。夫人忽小疾。既癒、出所積券曰、「此長物也。自吾積此、意不樂、果致疾。今宜悉以謝醫、則吾無事矣。」生四子三女、悉自乳。曰、「飢人之子、以哺吾子、是誠何心哉。」誠齋父子、視金玉如糞土。

（羅大經『鶴林玉露』丙編 卷四）

理科第4問

昔、楚襄王登樓台。有風、颯然而至。王曰、「快哉此風。寡人与衆共者耶。」宋玉曰、「此独大王之風。庶人安得而共之。」不知者以為諂也、知之者以為諷。

唐文宗為詩曰、

「人皆苦炎熱 我愛夏日長」

柳公權統之曰、

「薰風自南來 殿閣生微涼」

惜乎、宋玉不在傍。

(阮閱『詩話總龜』前集 卷七)

1990 年

文科第4問

荒園独歩 袁宏道

寒食春猶爛 東風草自芊

花燃無焰火 柳吐不機綿

宦博人間累 貧遭妻子憐

微官如可典 乞我買山錢

(袁宏道「荒園独歩」)

文科第7問

借書一痴、還書一痴、殊失忠厚氣象。書非天降地出。必因人得之。得而秘之、自示不広、人亦豈肯以未見者相俵。聚而必散、物理之常。父兄藏書、惟恐子弟不讀、讀無所成。猶勝腐爛篋笥、旋致蠹書之變。陳垂藏書千卷、名画、怪石、異花。作詩戒其後曰、

滿室圖書雜典墳 華亭仙客岱雲根

他年若不和花壳 便是吾家好子孫

垂死、悉歸他人。

(周輝『清波雜誌』卷四)

理科第4問

司徒北平王家、猫有生子同日者。其一死焉。有二子飲於死母。母且死、其鳴咿咿。其一方乳其子、若聞之。起而若聽之、走而若救之。銜其一、置于其棲。又往如之。反而乳之若其子然。噫、亦異之大者也。夫猫人畜也。非性於仁義者也。其感於所畜者乎哉。北平王牧人以康、伐罪以平、理陰陽、以得其宜。

(韓愈『韓昌黎文集』卷十四「猫相乳」)

1989 年

文科第4問

夜坐 元稹

雨滯更愁南瘴毒 月明兼喜北風涼

古城樓影橫空館 湿地虫声遶暗廊

螢火乱飛秋已近 星辰早没夜初長

孩提万里何時見 狼籍家書滿臥床

(元稹「夜坐」)

文科第7問

曹州於令儀者、市井人也。長厚不忤物。晚年家頗豐滿。一夕盜入其家、諸子擒之、乃隣里子也。令儀曰、「爾素寡過、何苦而為盜耶。」答曰、「迫於貧耳。」問其所欲。曰、「得十千、足以資衣食。」如其欲与之。既去、復呼之。盜大懼。語之曰、「爾貧甚、負十千以歸、恐為邏者所詰。」留之、至明使去。盜大感愧、卒為良民。

(李元綱『厚德錄』卷二)

理科第4問

昔有一友人、以豪爽自喜。同入西山。時初春、乃裸体跣足入玉泉山裂帛湖中。人皆詫異之、彼亦沾沾自喜。過數載、予私問之曰、「卿往年跣足入裂帛湖、可稱豪爽。」其人欣然。予再問之曰、「北方初春冰雪稜稜。入時得無小苦耶。幸無欺我。」其人曰、「甚苦。至今冷氣入骨、得一脚痛病、尚未痊也。當時自為豪爽為之、不知其害若此。」然則世上豪爽事、其不為裂帛湖中濯足者寡矣。

(袁中道『珂雪齋集』卷二十一「書遊山豪爽語」)